

26 April 2017

Lagi Warga Malaysia ditahan

SINDIKET PENYELUDUPAN DADAH KE MALAYSIA

Fakta
nombor

87 KILOGRAM

syabu ditemui di sebuah rumah sewa di Hatyai



Lagi Warga Malaysia ditahan

Bangkok: Pihak berkuasa Thailand menahan seorang lagi rakyat Malaysia disyaki anggota utama sindiket dadah di Lapangan Terbang Antarabangsa Suvarnabhumi, di sini, kelmarin, sebelum suspek menaiki penerbangan pulang ke Malaysia.

Timbalan Ketua Biro Penindasan Narkotik (NSB) Thailand, Mejar Jen Pornchai Charoenwong, berkata lelaki berusia 44 tahun dari Pulau Pinang itu ditahan pada jam 7 malam (waktu tempatan) selepas pihak berkuasa Thailand menjalankan pengawasan terhadapnya berhubung peranannya yang dua kali gagal untuk menyeludup dadah ke Malaysia awal tahun ini dan akhir hujung tahun lalu.

"Lelaki warga Malaysia itu tiba

di Bangkok kira-kira dua minggu lalu dan sentiasa dalam pengawasan polis sejak itu," katanya di lapangan terbang antarabangsa itu, kelmarin.

Beliau berkata, lelaki itu dipercayai anggota utama berikutan penemuan 87 kilogram (kg) syabu di sebuah rumah sewa di Hatyai, Januari lalu serta rampasan 52.4kg heroin dan 41.9kg syabu dari sebuah kereta yang dipandu dua lelaki warga Malaysia di Chumphon, Disember tahun lalu.

Suspek datang banyak kali

Katanya, ketika soal siasat, kedua-dua lelaki rakyat Malaysia yang ditahan hujung tahun lalu itu mendedahkan kepada pihak berkuasa Thai, mengenai pembabitian lelaki

Pulau Pinang itu dalam kedua-dua kes penyeludupan dadah itu.

"Suspek banyak kali datang ke Thailand sebelum ini untuk menempah bekalan dadah. Sebaik urusan selesai, dia akan pulang ke Malaysia dan menunggu bekalan dihantar," katanya.

Selain penahanan lelaki Pulau Pinang itu, polis Thailand juga berjaya membuat satu lagi tangkapan berprofil tinggi terhadap seorang warga Malaysia yang juga anggota kanan sindiket dadah antarabangsa, di Lapangan Terbang Hatyai, Rabu lalu.

Lelaki yang digelar 'Mr T' itu berasal dari Johor, didakwa bertanggungjawab terhadap beberapa percubaan menyeludup beratus-ratus kilogram syabu ke Malaysia.

BERNAMA